

Na osnovu člana 16. stav 2. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj 7/10), na prijedlog Stručne službe Vlade Zeničko-dobojskog kantona, Vlada Zeničko-dobojskog kantona, na 106. sjednici održanoj dana 04.04.2013. godine, d o n o s i

## **O D L U K U**

### **O KORIŠTENJU ELEKTRONSKIH MREŽA U ZENIČKO-DOBOJSKOM KANTONU**

#### **Član 1.**

##### **(Predmet)**

- (1) Vlada Zeničko-dobojskog kantona (u daljem tekstu: Vlada) podstiče zaposlenike kantonalnih organa uprave i stručnih službi, te kantonalnih upravnih organizacija (u daljem tekstu zaposlenici) na upotrebu elektronskih mreža u lociranju, prikupljanju i korištenju podataka u procesu donošenja odluka, obavljanju svakodnevnih poslova, razmjeni informacija korisnih za posao te na razvoj sposobnosti za efikasno korištenje elektronskih mreža.
- (2) Ovaj dokument pomaže zaposlenicima koji imaju pristup elektronskim mrežama pri prikladnom korištenju opreme i resursa u vlasništvu Zeničko-dobojskog kantona (u daljem tekstu: Kanton) i onemogućavanju mogućih zlopotreba.

#### **Član 2.**

##### **(Objašnjenje)**

- (1) Pristup znači ulazak na elektronsku mrežu Kantona. Pristup može biti unutar ili van prostorija Kantona i može uključivati udaljeni pristup.
- (2) Elektronske mreže su grupe računara i računarskih mreža koje mogu komunicirati međusobno. Ovo uključuje internu mrežu Kantona (u daljem tekstu: intranet), javne i privatne mreže izvan Kantona, kao i internet.
- (3) Elektronske mreže osiguravaju digitalni pristup informacijama. Obzirom da mreže funkcioniraju na kompatibilnim standardima i protokolima, korisnici mogu imati pristup mrežnim računarima i pridruženim aplikacijama. Ovo dalje omogućava pristup elektronskim bazama podataka i njihovo pretraživanje kao i komunikaciju sa drugim korisnicima povezanih mreža.

#### **Član 3.**

##### **(Oblast primjene)**

- (1) Ovom odlukom uređuju se uslovi službenog, prihvatljivog, neprihvatljivog i nezakonitog pristupa mrežnim servisima od strane zaposlenika.

#### **Član 4.**

##### **(Službeno korištenje)**

Zaposlenici mogu službeno koristiti elektronske mreže:

- a) u cilju pristupa stručnim, naučnim, tehničkim i drugim informacijama u vezi njihovog profesionalnog angažmana u Kantonu i obavljanja svakodnevnih poslova,
- b) u komunikaciji sa drugim institucijama javne administracije, te poslovnim partnerima,
- c) u cilju stručnog i profesionalnog usavršavanja za poziciju na kojoj rade.

**Član 5.**  
**(Prihvatljivo korištenje)**

- (1) Prihvatljivo korištenje elektronskih mreža od strane zaposlenika je:
  - a) pristupanje informacijama vezanim za razvoj općih sposobnosti za kvalitetno obavljanje poslova,
  - b) učestvovanje u komuniciranju putem elektronske pošte (u daljem tekstu: e-pošta) i na drugi način ukoliko takve komunikacije imaju veze sa obavljanjem posla.
- (2) Ako u toj komunikaciji zaposlenik izražava vlastiti stav, u istoj mora biti uključeno posebno upozorenje koje objašnjava da je to njegov stav, a ne stav Vlade.

**Član 6.**  
**(Neprihvatljivo korištenje)**

- (1) Sljedeće upotrebe elektronskih mreža, korištenjem informatičkih resursa Kantona, nisu dozvoljene:
  - a) pretraživanje, pristup i štampanje tekstualnih, grafičkih i multimedijalnih informacija koje su usmjerene na pornografiju
  - b) pokretanje internet programa, uključujući, ali ne ograničavajući se na, on-line igre, testove i druge zabavne sadržaje, kao nosioca potencijalne opasnosti po sigurnost računarskih sistema Kantona,
  - c) obavljanje bilo kojih aktivnosti koje na bilo koji način štete ugledu Kantona i krše norme ponašanja zaposlenika u javnoj administraciji,
  - d) obavljanje privatnih aktivnosti ili aktivnosti koje donose profit poput kupovine roba koje nisu za ličnu i porodičnu upotrebu, primanja usluga online, prodaja roba, pružanja usluga i reklamiranje istih,
  - e) uključivanje u bilo koju aktivnost političkog lobiranja, promoviranja političkih stranaka, skupljanja sredstava za iste i ostale političke aktivnosti,
  - f) uznemiravanje i širenje netrpeljivosti po spolnoj, rasnoj, nacionalnoj, vjerskoj, političkoj i drugimosnovama.
  - g) preuzimanje sadržaja sa interneta koji nisu vezani za posao sa posebnim akcentom na sadržaje koji podliježu zaštiti autorskih prava.
- (1) Nije dozvoljeno ugrožavanje sigurnosti računara ili informacija od strane zaposlenika uključujući:
  - a) pristup informatičkim resursima Kantona sa udaljenih lokacija koji nije u vezi sa obavljanjem službenih poslova,
  - b) dobivanje neovlaštenog pristupa,
  - c) neovlašteno uništavanje ili mijenjanje podataka ili onemogućavanje pristupa onima koji imaju pravo na pristup,
  - d) neovlašteno onemogućavanje pristupa servisima ili računarima onima koji imaju pravo na pristup,
  - e) pokušaj probijanja zaštite korisničkog računa ili računara,
  - f) otkrivanje šifri, pristupnih procedura ili mrežne konfiguracije trećoj strani,
  - g) slanje povjerljivih ili zaštićenih informacija na nezaštićen način,
  - h) presretanje privatne komunikacije ili e-pošte u prolazu,
  - i) širenje virusa i drugih štetnih programa,
  - j) neovlašteno postavljanje ili skidanje programa,
  - k) obavljanje bilo koje aktivnosti koja bi mogla ugroziti sigurnost bilo kog računara ili informacija Kantona.
- (3) Nije dozvoljeno ugrožavanje informatičkih resursa Kantona putem zagušenja ili prekida komunikacionog kanala uključujući:
  - a) slanje masovnih poruka putem e-pošte,
  - b) pretplatu na službenu adresu na primanje e-pošte koja nije vezana za posao.

**Član 7.**  
**(Nezakonito korištenje)**

Nezakonito je korištenje elektronskih mreža koje:

- a) je suprotno važećem Krivičnom zakonu Bosne i Hercegovine ili Federacije Bosne i Hercegovine, kao i svim drugim zakonima i propisima koji uređuju pojedina pitanja u vezi sa korištenjem elektronskih mreža,
- b) je već nanijelo ili vjerovatno može nanijeti štetu drugom,
- c) je namjerna aktivnost u ugrožavanju Kantona ili računara,
- d) je na neki način nezakonita aktivnost.

**Član 8.**  
**(Osiguranje servisa)**

- (1) Odjeljenje za informatičku podršku Stručne službe Vlade Zeničko-dobojskog kantona (u daljem tekstu: Odjeljenje) osigurava pristup intranetu svim zaposlenicima kantonalnih organa uprave, stručnih službi i kantonalnih upravnih organizacija koji koriste računar za obavljanje svakodnevnih poslova.
- (2) Odjeljenje mora svim zaposlenicima kantonalnih organa uprave, stručnih službi, te kantonalnih upravnih organizacija, koji koriste računar za obavljanje svakodnevnih poslova osigurati e-poštu sa domenom registrovanom na Kanton.
- (3) Rukovodilac ima pravo odlučiti da li zaposlenik u obavljanju svojih poslova ima potrebu za internet pristupom i pristupom podacima drugih institucija.
- (4) Rukovodilac mora oduzeti prava pristupa mrežnim podacima i servisima onima koji izgube status zaposlenika.
- (5) Ukoliko dođe do sumnje u kršenje odredbi ove odluke od strane zaposlenika, Odjeljenje o tome informiše rukovodioca sa prijedlogom mjera prema tom zaposleniku.

**Član 9.**  
**(Odgovornosti zaposlenika)**

- (1) Korištenje računarske opreme, elektronskih mreža i ostalih resursa Kantona u obavljanju službenih poslova uvijek ima prednost nad upotrebom računara u privatne svrhe.
- (2) Zaposlenici su obavezni na učenje pravilnog korištenja elektronskih mreža i kulture komuniciranja putem javnih servisa između ostalog i prijavom na obuke koje organizuju nadležne institucije.
- (3) U cilju izbjegavanja problema vezanih za ograničenost računarskih i mrežnih kapaciteta Kantona, zaposlenici su odgovorni za njihovo racionalno korištenje.
- (4) Zaposlenici moraju biti upoznati sa činjenicom da mrežni i internet kontakt ostvaren korištenjem e-pošte i domene registrovane na Kanton može stvoriti dojam kod drugih da takav pristup odražava zvanični stav Vlade.
- (5) Zaposlenici ne smiju koristiti elektronske mreže u bilo koju svrhu koja može negativno uticati na Vladu i ostale zaposlenike.
- (6) Zaposlenici su odgovorni za pridržavanje sigurnosnih politika i procedura u korištenju servisa elektronskih mreža, i održavanje od bilo koje prakse koja može ugroziti računarske sisteme i podatke Kantona, uključujući, ali ne ograničavajući se na računarske viruse koji mogu biti preuzeti sa interneta.
- (7) Zaposlenici su obavezni poštovati posebne zahtjeve koji su postavljeni na neke sadržaje elektronskih mreža, kao što su ugovori o korištenju istih, pravo o privatnosti korištenja i autorska prava.

**Član 10.**  
**(Praćenje)**

- (1) U cilju efikasnosti i rješavanja problema, te procjene pridržavanja pravila korištenja mrežna komunikacija može biti praćena.
- (2) Praćenje, odnosno bilježenje i analizu aktivnosti na sistemu ili mreži vrši Odjeljenje.

**Član 11.**  
**(Isključenje primjene Odluke)**

Ova Odluka se ne primjenjuje na Ministarstvo unutrašnjih poslova Zeničko-dobojskog kantona.

**Član 12.**  
**(Provođenje Odluke)**

Za provođenje ove odluke zadužuje se Odjeljenje.

**Član 13.**  
**(Stupanje na snagu)**

Ova odluka stupa na snagu osmog dana od dana objavljivanja u "Službenim novinama Zeničko-dobojskog kantona".

Broj: 02-\_\_\_\_\_ /13.

Datum, 04.04.2013. godine

Z e n i c a

**PREMIJER**

*mr. sci. Fikret Plevljak, dipl. ing.*

DOSTAVLJENO:

- 1x Svim kantonalnim organima uprave,  
    stručnim službama i kantonalnim upravnim organizacijama,
- 1x Stručnoj službi Skupštine,
- 1x "Službene novine Zeničko-dobojskog kantona",
- 1x a/a.